

PAMFLET
697a

By forme van Discours/

aen allen en eenen yeghelijcken Landen / Pro-
vintien / Steden en Ghemeenten / Inhoudende t' Epita-
phium op de Doot des Doorluchtighen Hooch-gheboorn
Fursten en Heere/Heern Wilhelms/byder gratien Godts
Prince van Oraingien / Graue van Nassau / Catzeneln-
boghen / Vianden / Dietz / Lingen / Bueren / Leerdam / etc.
Marquiz vander Veere ende van Vlissingen : Heere ende
Baron van Breda / Grimberghen / Arlay / Noze-
rop : Erfburchgraef van Antwerpen
ende van Belanson /

Hooch-loflijcker memorien.

In zijnen leuen Gouverneur Generael / van Brabant /
Hollandt / Zeelandt ende Utrecht / Admirael
Generael vande Nederlandt-
sche Zee / etc.



TOT DELF.

By Albert Hendrickz. Drucker Ordinaris der Staten
landts van Hollandt. Anno 1584.

MET PRIVILEGIE.

misso sepaubris

697a

40

54

Extract vande Priuilegie.

DE Staten Van Hollandt hebben gheconsenteert
ende gheoctroyeert Aelbrecht Heyndricxz. / Raer-
lyder Drucker Ordinaris / te moghen Druckey zeecker
Remonstrantie by forme van Discours aen allen ende eenen
yeghelijcken, Landen, Prouintien, Steden ende Ghemeenten,
Inhoudende t'Epitaphium op de Doodt van sijne Pr. Excell^{tie}.
Hoochloflijcker memorien. Sonder dat tselue jinne de
Voorz Landen Van Hollandt binnen drie jaren kerstcom-
mende / buyten consent vanden Voornomenden Aelbrecht
Heyndricxz. / naeghedrukt ofte swercoft sal — moghen Sobor-
den. Ghedaen tot Delff. Den xxij^{en}. Augusti / anno Ses-
thienhondert Vier-ende-tachtich.

Ter Ordonnantie vanden Staten

By my

C. de Rechtere.



Remonstrantie,
By forme van Discours/ aen allen ende een yeghelicken Lande/ Provincien/ Steden en Gemeenten/ Inhoudende t' Epitaphium op de Doot des Doozluchtigen Hoochgeboorn Fursten en Heeren/ Heern Wilhelms/ byder gratien Godts Prince van Oraingien/ Graue van Nassau/ Catzenelbogen/ Viandé/ Dietz/ Lingen/ Bueren/ Leerdam/ &c. Marquiz vander Deere en van Vlissinghen/ Heere en Baron van Breda/ Grimberghen/ Arlap/ Rozeroy/ Erfburchgraef van Antwerpen en van Besanson/

Hooch-Ioffijcker memorien.

In zijnen leuen Gouverneur Generael/ van Brabant/ Hollandt/ Zeelandt/ Orieslandt ende Vtrecht/ Admirael van de Nederlandtsche Zee/ &c.

Daerbeneffens

Gheboecht verscheppen vermaninghen tot Voorsichticheyt, Eendracht ende Vrijheyt: mitsgaders die verblindtheit en den staet der Landen: die Tyranny ende wreedtheit der Spaengiaerden en haren aenhangers: oock wat slavernye sy den Landen willen onderwerpen:

Hoe/

Ende met wat middelen/ die selue Landen daer wt moghen verlost werden. Endtlick/ wort hier-inne ghedebateert/ alle tghene dat eenighe onwetende ende onverstandele Patriotten/ mitsgaders oock die Spaensche Daps-wenscher souden moghen contrarie sustineren/ omme daer mede niet alleen een opzoer inden Landen te maken/ maer oock allen goeden/ eeuoudighen/ ende weynich nadenckenden menschen af te trecken ende keeren vande affectie tot die

Vader-landtsche Vryheyt.

Ghedediceert aenden Edelen, Erentfesten, hooch-gheleerden, vvijsen, voorsichtighen, seer discreten Ridderchap, Edelen, ende Steden van

Hollandt, Zeelandt ende Vtrecht, Representerende de Staten vanden seluen Landen, Tot beschermenisse Godes Woort,

Vryheydt, Wijs, Kinderen, goet:

ende alles

Door eenen Liefhebber der Vaderlandtscher Vryheyt.

Leest met verstant, herlesende wilt onthouwen,

Onthouwend, stelt te verick, oft het sal u berouwen.

A ij

20 Aen allen Liefhebbers ende Beschermers der
Vaderlandtscher Vryheyt.

Het Epitaphium des Hoochgheboorn Prince van Orangien
Sult ghy, o Nederlandt, hier in moghen Lesen,
Oock die Dootkist des Tyrans van Hispaengien,
Wort hier in bereydt, Cloeckhertich wilt wesen,
Ghebruyct Wijsheyt en Voorsicht, met Eendracht ghepresen,
Want t'ghelt v Vryheyt, door-leest my doch wel:
Godt is met v, vecht stout, en wilt niet vresen,
Noch Paus, noch Spaingiaert, Doodt, Duyuel, oft Hel.

*T'Epitaphium, vriens Naem d'eerste letter het bediet,, is,
Zijnder Regering en Daedt, oock hoe die Moort gheschiet,, is.*

W at vveent en sucht ghy? o Nederlandtsche Lantdouven,
I n mijn Doodt, daer den Gheest en Ghedachtenisse vol trouven,
L euendich by v blijft, door mijn Daden groot van famen:
H eeft der Spaengiaert gheen hoop', om t'bloet van Nassouven,
E n v te veryvinnen, dan door Moort, t'vvort onthouven:
L ieuer dan Ick in mijn gheslacht des Moorders Namen
M oeste lijden, hebb' gheleden den Doot-scheut, t'sijner blamen,
V anden Coninck, een Tyran, ten kan hem niet baten:
A lleen blijft Eendrachtich, vecht stout, vvilt des niet schamen,
N ae het suere compt het soet, Godt sal v niet verlaten,
N ae-volcht mijn Raedt, vermaent het kint opter straten
A l rghene Ick v, tot beschermen der Landen,
S oo vvcl ghedaen hebb', met den vromen Soldaten,
S ulcx dat sy na v, den Spaengiaert ter schanden,
A ls ghy de Vrijheyt, met den vaillanden,
V rijmoedich beschermen, vvaer toe mijn Edel gheslacht.
W ilt ghedencken aen mijn Doodt, cloeck als verstanden,
E n vvandelt in Godts vreesse, Dach ende Nacht,
N ae-denckende vvat hy vvonders, door mijn handt, heeft gevvracht.

In Carnatio Mortis.

*Eens Princen, vier Princeessen, volghen haer Namen en Jaer,
Als elf Kinder Vader-loos vvorden, te Delff openbaer.*

BVren en saXen, borbon, koLIngY aenhoort,, hler,
S'Vaders cere groelt, naer Is hY VerMoort,, flier:

I. K.

Den Edelen/ Erentfesten/ Hooch-gheleerden/
 wijsen/ voorzichtighen/ seer discreten Ridderchap/
 Edelen/ende Steden van Hollandt/ Zeelandt ende
 Utrecht/ Representerende die Staten vanden seluen
 Landen / mijne ghebiedende Heeren ende Over-
 richeden.



Dele/ Erentfeste/ Hooch-gheleerde/ wijsen/
 voorzichtighe zeer discrete gebiedende Hee-
 ren/ als ick by my bedachte/ waer mede ick
 mochte excuseren mijne vermetelheyt / dese
 aē uwer E. te verthonen/ en hebbe niet an-
 ders wetē by te brenghē / dan tghene *Momus*
 wis dē Vulcano verweeten heeft/ ouer des mensche beelt by
 hem gemaect/ daer aen vergheten te hebbe/ een cleyn beer-
 seken by t' herte/ omme daer dooz te sien des seluen gedach-
 ten en ghemoet daer verborghen: Willende uwer E. daer
 mede ghebeden hebben/ my tselue also ten excuse en besten
 af te nemen/ ghelijck uwer E. mijn affectie en ghemoet wt
 dit Discours/ als dooz een venster/ sullen beters en wijders
 met het herte en den waeromme moghen aenschouwen en
 oordeelen / tot wat eynde mijn voornemen is streckende/
 wenshende dat aller menschen herten niet metten monde
 (ofte onder den ppocrijschen hoet) maer metter daedt/
 also mochten bekend werden. Tghene E. Heeren my be-
 weecht heeft desen aen uwer E. te Remonstrerē / gheschiet
 niet als oft de selue des van noode ofte onbekent ware/
 maer tot dien fine/ by uwer E. ghevisiteert en onder uwer
 E. naem en protectie byden Steden en Inwoonders des
 Landts/ eenighe vruchtē tot onses Vaderlants nut moch-
 te voortbrenghen / die der dingen gheen kennisse ofte ach-
 terdencken en hebben: Biddende gantsch onderdanich-
 lick/ so uwer E. tselue eenichsins den Lande prejudiciabel
 A ij beuine

Ende op dat uwer E. moghen verstaē den waeromme/
en wat ick in dit Discours allen menschē/ van wat condi-
tie en ghesintheit hy oock zy/ wil te kennē ghenen/ eer ick
totten principalen mijner materien sal comen/ sal hun en-
de ons allen twee ghelijckenissen (als eenen spieghel onser
schanden) voor ooghen stellen: daer-inne wy/ op aldien
wy sulcx niet willen volghen/ onser aller ruynne en onder-
ganck moghen aenschouwē/ verghetende onse natuerlijc-
ke Redelickheyt/ den onredelijcken dieren/ in hare natuer-
lijcken handel/ ons verre te bouen sien gaen. Welck ten
eersten/ na des hoochgeachten Platonis verclaringhe/
aenden cleynen Hyperen/ als een wonder der wonderen/
kan gespeurt werden/ seggende/ Dat sy zijn die eerste vin-
derffen der ghemeene welbaerts zaecken/ leuende (so wy
pimmers sien) in Eendracht tsamen/ arbejdē te samen/ gaen
te samen/ en teghens den winter vergaderen hare provisie
en koozn te samen: jae dat meer is/ dat die stomme beesten
niets voor haer seluen/ maer alles voor haere ghemeene
welbaerts gebrypck/ bearbejden: en dat noch bouen al te
verwonderen en t'aenschouwē is/ haere goet regiment en
ordre/ hoe dat sy haere wooninghen repnighen/ hare pro-
visie nat en eenen quade licht ontfangen hebbende/ droo-
ghen en verluchten/ hoe sy van haren arbejdt comen/ dat
sy den anderen gheē quaet doen/ haer d'een in des anderen
arbejdt verblijdēde: en tghene ons in een groote beschaet-
heyt brengt/ datter een veertich ofte vijftich dupsent Hyperen

ren (ist moghelijck) in een eert hol te samen woonen / daer
teghens men liet dat twee menschen in een stadt niet kon-
nen in vreden en eendracht te samen wesen / ick late staen
die oneenicheyt der landen. Willende by desen ghelijcke-
nisse te kennē gheuen / en wenschen van Godt gheē meer-
der goet / dan dat wy mensche / die ons den naem vā Chri-
stenen beroemē / alle onse VVijsheyt en Toeverlicht te wer-
ke steldē / om ons in soodanigher Eendracht t'onderhouden
ende beschermen / als die clepne Speren met VVijsheyt en
de Voorfichticheyt zijn leuende.

Maer wat ist? gheue ons die clepne eerdtwormē eenich
goet exempel / die Vogelkens des Hemels / bandē grooten
totten clepne / willen t'onser schanden niet stille swighen /
maer bewijsen metter daedt wat wy behoore naer te vol-
ghē t'onser behoudenis en Vryheyt / want so wanneer sy
ghevangen worden / aenmerct wat een tegenstant / weere
en ghewelt sy bedrijven met haere clauwen / hoornen / bee-
nen / beek en vloghelen / oock met haere gheluyt beclagen-
de en te kennen gheuende haere ellendt ende verdriet / hoe
seer lief dat sy hebbē t'ghene sy (met gewelt) verliesen: Dat
daeromme wy mensche met verstant / kennisse / sprake / oo-
gen en ooren / door die natuere so redelickē gheschapē zijn-
de / t'onser beschermenisse alle weere en gewelt behoorden
te bieden en doen / omme niet met henluyden in een ewi-
ghe geuackenisse en seruituyt te moeten leuen en steruen.

Dit zijn die twee Exempelen die ick uwer E. t'onser al-
ler bemaninghen / mede hebbe willen presenteren / en die
selue oock noodichste gheacht totten ingāgh mijnes voor-
nemens / op dat wy eenmael alle tsamē der Speren VVijs-
heyt / Voorfichticheyt ende Eendracht / mitsgaders der clep-
ner Vogelkens begheerte ter Vryheyt in onser aller her-
ten pzenten / ende daer door beweecht te worden henluy-
den niet alleene nae te volghen / maer verre (in sooda-
nighen

*Volu-
men
L. b. 1. 1. 1.*

nighen voornemen) te bouen te gaen / ghemerct het ons
allē veel meer aengaet / als in mijne Remonstrantie bree-
der bewesen sal werden: ons segghe ick / die menschen zijn/
ende met eenen mensche te doen hebben / teghens den bee-
sten die allen menschen subiect ende onderworpen zijn.

Comende dan tot het principael / sal hier allē / en eenen
pegelijcken bysonder / vooz ooghen stellen den staet / daer-
inne wy ghestaen hebben / oock ten deele daer wt verlost /
en als nu weder schijnē inne te vallen: Namentlick / so veelē
Landen / so veelē Steden en Natien te konnē lijdē eenen
Tyran / die anders gheen macht heeft / dan men hem toe-
en laet / die niets kan quaet doen / dan den ghenen diet wil-
len lijdē / ofte die daer teghens niet deruen spreken: endt-
lick datmē moet sien een millioen vol millioenen mensche /
onder die slavernijē en tjock / sonder noodt en onbedwon-
ghen / dat is al-willens / te sitten en alleenlick te leuen / als
het schijnt dooz eenighe toouerijē ende besweeringhe des
eenighen Naems / van eenen Tyranighen Spaēgiaert /
diens macht wy niet hoēuē te vresen / die VVijsheyt, Voor-
sichticheyt ende Eendracht der Nperen / midtsgaders der
clepner voghelkens begheerte ter vryheyt, vooz onsen oo-
ghen ende handen nemende ende ghebruyckende / want
hy maer een Menschē ende niet Godt is / te meer / daer wy
niet om zijnent wille / maer hy om ons te beschermen ende
dienen ghemaecte was.

Het welcke oock der Deurluchtigher / Hoochghebooz-
ner furst / der Prince van Oraingien / Hooch-loflijcker
memozien / wel ter herten nemende / en bedenckende waer-
henen desen eenighē naem des Coninc / van andere Ty-
rannische zijne supposten misbruyct werde / hem daerom-
me als een Chzistelick en cloeckhertich Krijch-furst daer
teghens dapperlick te weere ghestelt / ons niet alleen die
ooghen gheopent / maer oock metter daedt ons daer van
te ver-

te ver-

te verlossen/alle tijt ghearbeyp heeft. Ende soude onghetwijffelt daer inne niet gefaelgeert hebbē te continueren/ten hadde gedaen des Tyrans bloet-dorstich herte/ (niet konnende zijn vanden anders verwinnen) hy den heerlijcken Fursten en Heeren nu onlancr moordadelijck heeft doen vermoorden/meenende daer mede/nu hy den Prince van kant heeft gheholpen/ons wel haest in eenen soberen staet/ende onder zijn ghewelt sal doen comen.

1. Het welcke ooc hem wel soude aen laten sien te geschieden/ten waere daer tegens/dat wy vooz t'eerste/vooz oogen moeten nemen/dat wy eenen Godt hebben/om op te vertrouwen/wesende een iuerich en jaloers Godt/thoonnende dat hy ons lief heeft indien wy hem volgen/en laet vallē indien wy hem verlaten / ons ontreckende des menschen hulpe en raet om daer so vast niet op te vertrouwen/waer door wy hem souden moghen vergeten.

2. Ten tweeden/dat wy gedachtich sullen wesen/en behoore te volgē/ die cloeckhertige en stantvastige voetschappen eenes so heerlijcken Princen en Furste/die alsnu mettē laetsten droppel zijnes bloedts/ beneffens zijne drie vrome Christelijcke broeders/niet vooz haer seluē/maer vooz onser aller Vrijheyt ende behoudenisse/ bewesen hebben/hoe wy ons behooren te dragen en houden/tegens den voorsz alghemeynē wreeden Spaenschen Tyrannen ende heeren aenhanghers.

3. Ten derden/dat wy ooc moeten dencken en onse reeckeninge daer na alsnu aenstellen/dat zijne Prince. Excell. eenmael moeste steruen/ dat daeromme die beschermenisse onser Vaderlātscher Vrijheyt niet behoort int graf gedragen te wordē/maer ter contrarien/dat wy daer door als wt den slaep der onachtsaemheyt en slappicheyt behooren wacker te worden/bedenckēde die oorsaecke waeromme wy de wapenen in handen hebben ghenomen/om-

B

me daer-

me daermede niet alleen ons seluen/die alsnb leuen/tegens
der Tyrannen ghewelt te beschermen/maer dat wy met
gheruster conscientien onsen kinderen en nacomelinghen
moghen achterlaten / tghene wy met onsen bloede alsnb
voorztaen/namentlick: een Vryheyt der conscientien/we-
derstant der Tyrannie/en behoudenisse onses selfs/ onser
vrouwen/kinderen/goet/ heerlijcke landen ende steden.

4. Ten vierden/en daer veele aengelegē is/ dat wy met-
tē honden niet behooren op te leckē tgene wy eenmael wt-
ghespogen hebben/te wetē/het Pausdom eerst / en daer nae
die aengenomene waere Religion versaeckende/ erger dan
Godts-vergetende verlochende Hammeluchen/ en eeni-
ghes goet ofte welbaerts onweerdighe by allen menschen
souden gheacht/ en oock met recht/gehouden werden/op
aldien dat wy/ tgene Godt ons so rijckelijck verleent/soo
wepnich achtende en ter herten nemende/ ons souden te-
ghens Godt ende onser conscientien begeuen totten Egi-
ptischen vleesch-potten.

Het welcke of daer eenige wel toe souden mogen ghesint
zijn/oft werden/dwelck ick hope neen/ende datmen al de-
de watmen gedaen wilde hebben/en sal daeromme byden
Spaenschen en haren aenhanghers gheen gelooue noch
trouw ghehouden werden/wat den ketters/ vermogens
het Roomsch decreet/geen gelooue mach ghehouden/veel
wepniger byden Inquisitozischen/ can werdē/bysonder/
nadien wy wel weten/wat den Spaingiaert ons/ende wy
hem/malcanderen ghedaen hebben.

Ende dwelck ons allen wel can een goet voorszift we-
sen/behaluen den verraderischen moort der onnoselen en
vrije Mooren van Granadē/dat Duck d'Alba in een Spaens
Pardoen tot Nimmegen dē 16. Julij 1573. onder zijn eygen
hant heeft wtgeschreuen/ons arm Vaderlant op die tijdt
drepghende/onder andere/met dese woorden in substantie.

Mack

Maer indien ghy-luyden dese vermaninghe, ghenade ende barmherticheyt als Hartneckige ontfangt, ende niet achtende verworpt, ghelijc ghy-luyden tot noch toe (v ooren stoppende) gedaen hebt, So vvillen vvy v-luyden alle t'samen te vooren gevvaerschout hebbē, datter noch straffe, noch vvreetheyt mach sijn, het zy, hoe sy oock zy, die v niet ouer-comen en sal, so vvael aen uvven persoonē, als door plonderinge, honger, ende doort svveert: Inder voegen datter int generael noch erghens eenige Reliquie ouer bliuen en sal, vant gunt datter noch tegenvvordich is. Maer sal sijne Mat. aenmerct des **Tyrans hert**/ t'lant vervullen met een ander vreemde Natie, en soude oock sijne Mat. niet meenen Godt noch hem seluen ghenoech ghedaen te hebben, &c.

Welcke dreygementen/ O Vaderlandt/ nadien zy inden jaer 73. wesende den last der oorloghe op v alleen en uwen geassocieerden / byden byant geschiet zijn/ op die tijt geen vrucht gedaen/ maer cleyn-achtende/ ons veel cloechertiger gemaect hebben/ hoe veel te meer alsnv behooren wy de saecke ter herten te nemē/ naedien men wel kan oordeelen/ wat gramschap en **Tyrannie** de Spaingiaert bedenct/ om ons t'onder te brengen/ die hem noch so veele jaren/ tegens alle zijne listen ende ghewelt by hem ghebruyct/ hebben wederstant gedaē: hem daeromme ooc zijn **Hoocheyt** en **Authoriteyt** (met goede redene) benemende/ die selue eenen anderen ouergegeuen/ en is voozwaer niet te twijffelen/ of hy soude zijn voornemen/ eenen tijt lanck (als hy wel kan) simulerende, volbrenghe.

Wy en behoeuen oock niet te dencken / sulcx willende ontvlieden / onse toevlucht weder te nemen in vreemde landen/ met wijs en kinderen gantsch naect en bloot/ tzal verre zijn/ wāt wy Godes handt niet konnen ontvlieden/ ende en ware by ons geen excusatie/ ons eyghen gheweldich Vaderlandt / hups/ hof/ goet ende al te verlaten/ daer

wt te loopen/den Tyrannen ouer te gheuen/ ende ons by
vreemde Natien te gaen vertrouwen/ die ons als trou-
loose daeromme met recht souden schelden/ ende daer voo-
ren houden/ datmen alsdan daer voozē lieuer de doot/ dan
langher te leuen/ souden begeeren ende wenschen.

So en sal oock niemant (des vyants ghenade ofte on-
ghenade verwachtende/ wes Religions gesintheit hy zy/
ja al waert den Paus van Romen selfs/ en met ons tegens
desen Spaigniaert hem gestelt hadde / exempel des Keyfers
Caroli s. dooz Borbon op Rome ghedaen) hem eenichsins
moghen excuseren/ want byden vyant geen respect geno-
men wert/ noch kennisse/ kan blijckē aen allen ingenomē/
ouerballen/ en selfs ouergegaene steden en plaetsen/ want
hy den Catholijcken om die salich te houden in haer Ca-
tholijck gelooue/ so wel als den ketters om haer ketterije/
sal doen ende doet steruen.

Maer gelijk het meer dan te veel bekend is/ wat goede
justitie bydē Bloet-raedt der Inquisitien/ allen den genen
die hem te rechte beroepē/ geadministreert wert/ en byson-
der als eenich Catholijck/ als meer voozdeels dan die ket-
ters/ die tot geen gehoor kunnen geraecken/ meent te heb-
bē/ by dien Raedt beclaecht wesende/ wat coxter expeditie
hy dan krijcht is wel gebleeckē/ en can wel aen zijne goede
paspoozt noch bliicken/ exempel aen den Grauen van Eg-
mont/ Hoorne/ en meer andere/ wāt des Bloet-raets pro-
ces staet veel te schoone/ daer het seyt tegens dē Appellan-
ten: zijt ghy Catholijck/ en hebt ghy den Coninc lief/ so en
dient ghy Godt en uwē Coninc niet getrou/ om dat ghy v
niet tegens de ketters om het Roomsche gelooue/ en des
Conincr gehoorzaamheyt/ te weere hebt ghestelt/ &c. Gaet
dan by te werck o ghy Nederlandtsche Moorders die-
naers / ende ghespaignolizeerde Malcontenten/ die om
reenen brock spaense vijghen/ ten appetijte van sodanigen
Tyran/

Opzā/v eygghen Vaderlandt/medebroeders en brunden
soect te bederuen / en niet en denckt wat ghy v seluen ouer
t'hoofst brengt: want ghedenct des vzielick / den put die
ghy voor ons graeft / sult selfs so wel als wy daerinne be-
grauen wordē/hoe Catholijck/ppocriytich/ bloetdorstich
ende iouerich ghy zijt om ons te bederuen.

Dit alles/mijn E. Heeren/dinct my te wesen het prin-
cipael en wterste boornemen des Opzāns/ en den eenigen
wech onser bederffenisse en ondergancks/mitsgaders ooc
die principale spoozen en prikelen/waer door wy gedron-
ghen worden te bedencken t'ghene voorsz staet / nament-
lick dat so veele menschen/ so veel natien/ so veel steden en
landen kunnen liiden eenen Opzān/ die niets quaets kan
doen/dan den ghenen diet willen liiden/ &c.

Ende op dat ons dan sulcx niet ouercome / O ghy Va-
derlandt/ so wilt noch opstaen wt den slaep der Onacht-
saemheyt/tot die beschermenisse onser Vaderlandtscher vry-
heyt/ en volcht nae die bloedighe voetstappen des Nassou-
vvisschen gheslaches / den grooten gheweldighen Godt
t'wuer hulpe aenroepēde/ ende der clepner Bieren V Vijf-
heyt, Voorlichticheyt en Eendracht/ omme also te comen en
v behouden inder Voghelkens begheerte ter Vryheyt.

Om nu alle tselue wel en niet goeder ordie int werck te
brengghen/sal wt het beghinsel der V Vysheyt moete comen
die vzele Godts / waer-inne dan die Ouerricheden als
Godt vzeesende voorgangers haere Ghemeente/ Burger-
rijen en Onderlaten inde vzele des Heere een goet exem-
pel sullen gheuen: Want te vergheefs waectmē daer Godt
niet met is/maer vergheten wordt.

Ende sal volgen/door een Godtsalighe regeringhe een
goede Eendracht/die alsdā maect dat clepne dingen groot/
ende door tweedracht groote dinghen clepē werden.

Het welcke oock der Spaēscher Escouedo bemercken

B iij

de/dat

de / dat dooz die goede Eendracht de generale Landen ten tijde der Pacificatie van Gendt onwinlick warē / daer dooz den bederffelijcken raedt gaf die Landē niet ouerwonnen te moghen werden / dan dooz seditie / twist en tweedracht onder malcanderen: wat daer wt ghevolcht is moghen de Landen noch wel beclaghen.

Maer hier van hebbē nwer E. en ons lieue Vaderlant / met den volstandigen Ghebnierden Prouintien en Steden / Godt hoochlick te dancken / dat wy in so goeder Eendracht / Rust en Vrede onder malcanderē alle dese troublen gheweest hebben / omme waerinne te continuerē Godt almachtich moet ghebeden zijn / en wy moete malcanderen des oock vermanen volstandich daerinne te bliuen.

Ende op dat wy Godt te gheruster mochten dienen / ons seluen / ons wijf / kinderen / goet / bloet / hups en hof in goeder Eendracht beschudden en beschermen / teghens die voornoemde groote onghehoorde / onverdzaechlicke ende moordadische Tyrannie der Spaengiaert en zijner aenhangheren / moeten wy die Voorfichticheyt ghebruycken / in manieren als volcht / met welcke drie crachten wy sulen vermoghen aldan teghens alle ghewelt der vyanden te wederstaen.

Niet dat ick sulcx doe om uwer E. eenighe mate te stellen / om die Voorfichticheyt te ghebruycken / dat zy verre / maer wil tselue alleen stellen voorden eenvoudighen / simpelē / en den weynich nadenckenden menschen / op dat sy naemaels hem des niet hebbē te beclaghen / en dat sy daer dooz moghen ghedronghen werden / tot haerder behoudēnisse / wat ijuerigher te wesen.

Datmen oock naemaels den ghenē aldan sal moghen beschuldighē / die oorsaecke mochte wesen / omme gheenen goeden raedt en waerschouwinge ghevolcht te hebbē / dat dooz haere schult / ende onbehoorlicke onboozsicht / haere Stadt /

stadt/ sy/ haere vrouwen/ kinderen/ goet ende al in han-
den der Tyrannen souden vallen/ en als slaen daer onder
versmoort bliuen.

Ende also niet te twijffelen en is/ of die goede Prouin-
tien alsnoch in Eendracht ghebonden/ sullen stantvastich
in haer voornemen en resolutie bliuen/ omme den vpan-
den niet te vallen als een proye inden clauwen/ so moeten
wy O Vaderlandt met Voorfichticheyt dese middelen ghe-
bruycken.

1. Eerstelick met goeder hulp en Eendracht die Genera-
liteyt/ Staten vanden Landen/ en der Hooger-Queriche-
den/ mitsgaders den Magistraten der stede te ghehoor-
men en helpen/ tot welvaert der ghemeyne Landen: want
die selue/ als daer toe by ons vercozen/ wy niets (sonder de
selue) noch sy (sonder ons) en vermoghen.

2. Ten tweeden/ met goede Toeverficht waecken en op
onse hoede wesen/ teghen alle verraderijen/ verrassen ende
ouerval onser vpannen/ en den ghenen alle goetwillicheyt
ende blyticheyt bewijfende/ die daer toe byder Hoogher-
Quericheden ende ons verordent zijn/ etc.

3. Ten derden/ dat wy onsen landen ende steden in tijts/
ende eer den slach ons op den hals compt/ met goeder for-
tificatien voorzien/ teghens alle ghewelt der vpannen/ op
dat wy hem/ ons bespringende/ den kop te vrier moghen
bieden/ en door soodanighe verseeckerighe met so veele
garnisoens niet hoeuen beset te wesen/ als wy wel souden
behoeven by faulte van ^{goede} quade fortificatie: Diet besocht
hebben/ wetent.

4. Ten vierden/ ende daerinne het meeste ghebreck is/
jae waer door wy inde meeste ruynne gherake/ moete wy
onse steden ende stercken in tijds voorzien/ met goede pro-
uisie van prouande ende ammonitie/ noodich in een be-
leghering. Ende hier inne behoort ghy v/ O Vaderlandt/
selfs

selfs te helpen / v solders en schappzpen met wat koozns
en andere hupflijcke behoefden te versorgen / inde plaetse
vande kostelijcke cleederen / linnen en tinnen / gout oft sil-
uer / dat ghy sonder prouffijt in uwen hupfen ende kisten
bewaert ter hoouerdijen.

Ende also dese vier voozghestelde middelen met wooz-
den en wenschen niet konnen te weghe gebracht werden /
oock dooz dien den last der Landen dooz d'innuatie der by-
anden / en die particulier schulden der steden / hoe langher
hoe swaerder werden / beneffens dien / die schattinghe on-
der den ghemeenten seer swaer schijnt / doch bysonder by-
den ghierighen ofte den quaetwillighen: So laet het hem
aensien / indien wy daer niet in tijds voorszien / en volcht
daer wt / dat wy inde barmherticheyt onser byanden alle
daghe (als een os voorde bijle) moeten bliuen liggen / met
goede vooz-weten / ende al-willens : jae het schijnt dat wy
den byandt oorlaeck gheuen te doen t'ghene hy anders
soude moghen laten.

Om dwelcke te behoeden / so moeten wy onsen eyghen
osse byden hooznen vatten / en bedencken / dat het ons lij-
delijcker en beter sal wesen / die helpt van onsen goederen
te gheuen en employerē tot beschermenisse / goede wacht /
fortificatie en prouisie van onsen Landen / steden en sterc-
ten / dan dat wy by faulte van dien op eender nacht / ende
in eender uren / niet alleē die helpt van onse goederen / maer
lijf / goet / wijf kinderen en al souden verliesen : wat salt
ons dan baten / waer mede sullen wy ons dā beschermen?
tbeclaghen sal dan te late wesen : aenmeret aen Haerlem /
Naerden / Zutphen / Oudewater / Schoonhouen / Leer-
dam / Vlaenderen ende meer andere landen.

O ghy mijn Vaderlandt, O goethertighe Borgherrijen, O ar-
me Inghe setenen / Antwoort my op mijne vraghen / ofte
vzaecht / ick salt v segghen / ende hoorz : *Felix quem faciunt
aliena*

aliena pericula cautum. dat is: Hy spieghelt hem wel/die hem
aen eenen anderen wil spieghelen. Doet eens open v oo-
ghen/ontstopt v oozen/ liet ende aenhoozt/ want het mes
staet op die keele/tis tijdt.

Wiens raedt/ wiens hulp/ wat middel ofte wat wech
sullen wy ghebruycken en volgen / t'onser bescherminghe
en verlossinghe/ in sodanighē noodt en ouercomen der vy-
anden/ waerinne wy ons seluen moetwillens ofte ten ap-
petijte van eenige/ die om ghiericheyt en quaetwillicheyt/
ofte den vbandt meer dan ons goede Vaderlandt toeghe-
daen wesende/souden laten vallen?

Wat gout/wat siluer/ costelijcke hooneerdighe cleede-
ren en cleynodijen inde kisten / die groote coopmanschap-
pen/volle kooznsolders ende schuyeren / schepen ofte wa-
ghens/ zullen ons connen helpen: oft wy met alle dat niet
en zullen vallen in handen der vbanden?

Wat bolwercken/wallen/ borstwepzininghen / graften/
gheschut/oft andere noodighe defentien zullen wy hebben
te bieden?

Endtlick/als ons de vbandt ouer-balt en meester wort/
het zy met ghewelt/ met verraderrijē / oft met accoozt / en
alsdan moeten lijden en aenschouwē onsen vrouwen ende
dochteren schoffieren / ons lijf rantsonneren/ onse goede-
ren sien wech draghen / wy mannen met grooten hoopen
ghehangen / gekopt / verdroncken en jammerlijck ghe-
pijnicht: exempel aen Breda/ Antwerpē/ Lpere/ Dierhe-
len/ Alst/ &c. wat raedt?

Ik wete/en ben des oock wel verseeckert/dat het ghe-
ne ick gheseyt hebbe hier voozen/ veele niet wel in d'oozen
en klint / en t'ghene ick noch segghen sal den seluen noch
veel weynigher sal aenstaen en behaghen: Maer en wilt v
des O Beminders der Vaderlandtscher Vryheyt niet latē ver-
dzieten/noch aflaten keeren/veel weynigher v des naems
C van

van eenen Tyrannigen Spaigniaert / door een pdele persuaſie der Inquifitoriffcher dienaers afschrieken laten / ofte van v ooroghenumē volſtandicheyt afwenden : laet het v niet verdrieten / al iſt dat ick te ſeer wt den propooſt ſchijne te gaen / met blijt te bedencken wat ons noodich is.

So langhe als wy die oorloghe defenſiue willen voeren / ofte noots wegghen moeten voeren / en ſullen nimmermeer van die oorogaende periculen mogghen verloſt werden: oorſaecke / ouer mits de vbandt / gheē tegenſtant hebbende / het eene voor en t ander naer belegghert / ouervalt en inneemt. Verhaluen iſt noodich / omme van ſo veele ſchrickelike periculen en eeuwiche Tyranniſcher ſlaue-rijen verloſt te wordē / die vier voornoemde middelen niet met woorden en wenſchen / maer metter daedt en terſtont t'effectueren / en onſe Landē niet alleen te verloſſen / maer den vbanden ſelfs met een offenſiue oorloghe te ghaen beſoecken: Omme waer toe te gheraecken / wy ſo veel rupteren ende knechten int velt moeten hebben / als onſe regierende Ouerricheden noodich ſullen beuinden.

Waer toe dan die teghenwoordige middelē / door d'iuafie en ouer-bal der vbanden niet ſuffiſant zijn / ende die particuliere ſchulden der ſteden alle daghe vermeerderen / ende bouen al / dat die ghemeente met groote ſchattingen ende oncoſten beſwaert werden / is waer / ick moet het bekennen: maer wat raedt?

O Vaderlandt, Laet ons niet langher meer vraghē / hoe? wat? ofte waer-mede wy geholpen moghē werden? en die middelen van ghelt becomē / van noode weſende? Ic ſalſe v hier voor ooghē ſtellen: wiltſe ter herten nemē / bedencken en gebruyckē / onder behoorlijcke proteſtatie / dat eē peder nae zijne conſciētie zijns ſelfs Richter daer ouer moet zijn / ghebruyckende die prikelen en ſpooren hier voorn ghe-noechſaē verclaert: te meer noch / alſo den tijdt ſulcx epiſcht /
ende.

ende ons lijdelijcker sal wesen het water te draghen om
eens anders hups te lesschen vandē brande / dan dē brande
tot het onse te laten comen.

Ick wilde ick mijn penne konde ophouden omme yet
meer anders alhier by te voegē / maer het schijnt het moet
so wel ghespoken als ghedacht / gheschreuen als ghesept
zijn: Hoe veel isser doch / jae den meesten hoop / die alsnb
niet een stuer / so sy segghen / te gheuen en hebben / byson-
der als sy vzij ende onbeschadicht moghen bliuen sitten /
ende soo men seyt / die roede vanden eers is. Maer wan-
neermen eenighe schade heeft gheleden / het sy door plon-
deringhe der vpanden / brant / water-noot / ofte als inē een
sone ofte dochter heeft wt te hijlicken / Hoozt dan die selue
eens claghen en snozcken / die een heeft sus veel gelt / gout /
siluer / hupsraet en cleederen inden ouer-val der vpanden /
d'ander so veel inden brant en water-noot ghelaten / ende
die nyeuw ghehoude hebben so grooten goet by een ghe-
bracht alst water diep is / &c. Dit zijn des ghemeene mans
clachten en excusatiē / en daer mede ist al ghedaen / en die
vpandt moet te Landt wte oft hy wil oft niet. Helas hoe
bedrieghen wy ons seluen / en maken het mes scherp t'on-
ser eenwigher bederffenisse.

Hoozt alsnb O Vaderlandt / ende alle die eenichsins be-
gheerte heeft t'zijner Vryheyt / den eenighen raedt / het een-
ich middel / en den wtersten toevlucht onser behoudenisse
se / waer door wy middelen ghenoech sullē hebben ons sel-
uen te helpen tot alle t'ghene des voorsz is: jae oock also /
dat ghy-luyden v leuen en Vryheyt / behoudenisse vā goet /
wijf ende kinderen / lieuer hebbende dan eenich goet deser
eerden / van self sult comen presenteren / bidden en beghe-
ren / so veel te willen gheuen totten ghemeenen besten / als
men een pegelick naer zyn vermoghē / qualiteyt ofte goet-
herticheyt sal opleggghen en ordonneren: Wilt dan alsnb

E ij

met

met vlijt ende verstant ouerdencken/ende in v herte t'ghene hier volcht oordeelen.

1. **I**nden eersten/ laet by een vergaderen en wedereren wat elck een wel soude willen geuen booz de Vryheyt sijner conscientien/en het ghenieten van Godes V Voort / indien v zelue ontnomen waere.
2. **W**ilt alnu v Vaderlant mede deplen t'ghene ghy in vreemde lande/ onder vreemde natien/en in groot verdriet en jammer soudt moeten verteeren / op dat ghy in v Vaderlâdt / v eyghē hups/hof/ landt en zant moecht regieren en bewoonen/ en daer van leuen/ en v seluen beschermen.
3. **W**at schade ghy dan oock lijden soudt in uwe goederen/hupsraet en coopmanschappen / wilt alnu mede totten ghemeynen besten opbrengghen/ op dat ghy het principael moecht behouden ende besitten.
4. **T**en vierde/ oft ghy noch het gebruyck van uwe goederen moecht ghenieten/sonder Vryheyt der conscientien/ wat ghy ten minsten soudt willen jaerlicx gheuen/omme ten allē uren niet te verwachten den ouer-val der Spaenscher Inquisitien/ diemen subiect soude moeten wesen/ de Cyran onse meester wesende?
5. **V**raecht uwen medeborggher/ en richt daer naer v seluen/wat hy jaerlicx/ter maent/ ofte ter weecke soude willen gheuen / in goede verzeekeringhe te moghen slapen/waken/opstaen ende wandelen?
6. **I**tem/daer het Godt booz behoeden wil/dat wanneer ons de byandt in eenighe van onse steden omcingelt ende beleghert hadde/ hoe veel eē peder soude willen gheue omme bypten der stadt te wesen / als die niet behoorlick ghefortificeert en waere.
7. **T**en seuende/ als v de byandt met geweld bespringt/ oft pemaêdt soude konnē die reeckeninge maken wat schade daer soude geschiedē in den hupsen/ eruen/schepen ende anders/

anders / en watmen oock wel soude willen gheuen de v-
pandt de stadt stormender-hant/ met verraderijen ofte ver-
rassen innemende/ om v leuen te salueren: daer by noch voe-
ghende / omme niet te sien dat uwe huyfrouwe en doch-
ters souden gheschoffiert werden/ noch dat oock uwe goe-
deren tot eenen roof en bueyt der vpanden niet soude we-
sen/ en ghy v leuen verloren hebbende/ die groote rantsoe-
nen/ die ghy den vpandt moeste opbrenghe/ soudt moghen
sparen? Antwoort my/ o ghy/ wie ghy zijt cleyn ofte groot/
of niet alle die schaden / behoudenissen van leuen en eere/
van huyfraet en rantsoen/ niet veel meer / jae noch eens so
veele costen sal/ want ghene ghy door bedwack soudt moe-
ten aenden vpandt betaelen/ dan t' ghene ghy (omme van
alle sulcke periculen bewaert te wesen v opgheleecht) sult
moeten op-brenghe?

8. Ten achtsten/ verneempt doch eens aen uwen mede-
borgheren oft nabuer / hoe veel dat jaerlicx wel kosten die
groote lobbē/ ghekoorde/ gheboorde/ ghesluelde/ ghehac-
kelde en doorsneden cleederen/ gheblomde/ gecromde boer-
sen en wambapsen/ &c. vergheet niet die groote banckette/
costelijcke byplofte/ ouerbloedige kermissen/ vastelauont-
maeltijden / het dobbelen en spelen / maer insonderheyt
wat dese gheconterfeyte Jockers en Jouffers aent hooft/
den eers / (onder reuerentie) en de voeten te cost hanghen/
Och wat eenen ghenadigen Godt soude wy hebben t' sel-
ne laetende/ en die onnutte costen/ d'welck immers al met
goeden ghereede ghelde moet betaelt werden / oft wy dat
inder ghemeene Landts-kiste brachten/ wat dunckt v/ O
Nederlandt en ghy Patriot / oft dat alleen niet ghenoech en
waere omme den krijch mede te voeren? ende noch en heeft
niemandt ghelt.

9. Bedenckede wat ellende/ jammer en verdriet dat den
hongher is/ O ghy mijn Vaderlandt / roopt en vooziet v nu
in tijts/

in tijts/ alle die steden die vroom begheren te leue/ t'ghene
ghy als nu omme eenen stuer cont becomen / naermaels
bijstich/ jae om dupsent stuers niet sout becomē/ waer na
dat ghy daeromme/ het 30 van hongher/ vergaen/ ofte in
den ghenade en onghenade vanden Tiran moet vallen.

10. Endtlick o ghy Bozgheren/ en meest tot v ghy rijke
Coopluyde/ denct daerom wanneer ghy ouer landt/ zant/
berch en bosch / ouer zee en wateren reyft om eenen stuer
te winnen/ v lijf en leuen in veel periculen hazarderende /
waeromme soudt ghy dan niet eenen halue stuer willen
gheuen/ om beneffens v leuen/ wijf ende kinderen / Godes
VVoordt ende Vryheyt/ die goederen te behouden/ die ghy
so periculeus ghewonnen hebt?

Daer souden noch meer deser-ghelijcke middelen v/ O
Vaderlandt/ boozgestelt werden/maer om een eyndt te ma-
ken deser mijner Remonstrantien / hebbe ghedacht/ men
wt desen alle andere ghenoechsaem sal moghē hem seluen
inbeelden: VVant het ghene dat quaet is, kan gheen goet
voortbrenghe, Maer het goet, niet vvaernemende, sal vvel
tot quaet gheraecken.

Maer welckē boozflach/ O Vaderlandt / der thien booz-
ghestelde middelen elck een wel mach en moet zijn reeke-
ninghe maken/ en mildelicken bedencken / wat wy in dese
zaecke booz een keure sullen nemen: Erstelick/ oft men lie-
uer de helft van zijne goederen heeft te gheuen/ omme van
allen die periculen verlost te wesen/ Ofte dooz onse ghieric-
heyt eeuwelick daer-inne te bliuen legghen versmoort.
Dooz mijne Resolution en Conclusie generale segg' en be-
sluyt' ick: Ghelt en Goedt vervvonnē te vvordē: Behoudenisse
van Lijf, Leuen, Goedt en Vryheyt verlooren te gaen door Ty-
rannije. Daerōme lieuer ons Lichaē en Goedt al t'employeren
voor ons selfs VVelvaert en Behoudenisse, Dan voor een ander
te vvinnen ende sparen tot onser aller Ruijnne en Bederffenisse.

Maer

Maer op dat ick dit Discours volcomentlick mach be-
sluyten / wil ick hier dit Argument tegens alle mijne voor-
gaende redenē teghenworpe / omme vande quaetsprekers
en contrerolleurs / die daer ghenoech mede te doen sullen
hebbē / bevrijdt te wesen : mitsgaders oock dat onse vpan-
den alle middelen benomen moghen werden / omme door
haere zoet sluyten / den eenvoudighen simpelen menschen
van een goet propoost ende deuotie haerder Vryheys be-
scherminghe niet af te keeren.

Eerstelick segghē eenighe en veele Patriotten / die der
zaeckē wel goet zijn : Ick soude wel bereydt wesen wat te
gheuen / maer die settinge is te onghelijck / mijn naebuer /
diens goet ick op die helft nae niet gerake / en gheeft maer
so veel / &c. Laet een ander eerst gheue nae zijne macht / als-
dan sal ick oock na de mijne doen / &c.

Antwoort hier op : Hoe ist mogelick in sodanighen set-
tinghē alles so effen en ghelijck te maken / oft dat het eenen
peghelijcken te passe is / utwe Magistraten / ofte daer toe
verordende Commissarij moetē daer-inne na haere goede
discretie doen / dienende soo wel tot hulpe des Landts als
uwer minster kosten en quetse. Oock dat ghy segt : Laet
mijn naebuer eerst gheuen nae zijne macht / alsdan sal ick
oock doen / &c. Sult weten / o ghy Patriott / sullen die goet-
hertighe niet eerst gheue / maer wachten dat d'ander eerst
ghegeuen hebben / voorwaer onse Lants-wel-baert soude
hanghē aenden ghenē diet lieuer anders saghē. Daerom-
me ghy eerst mildelijck gheuende / sult die andere oorsake
wesen te moeten volghen teghens haren danck.

Daer is noch een natie der Patriotten / die opte bier en
wijn-bancken / niet verder siende dā haere neuse lanck is /
spreken so onverstandelick / Waer dat het ghelt al blijft
datter ghegeuen is / en alle daghe opgebracht wort : t'gaet
al in eenen grondeloosen wiel : den blaenwē sack en is noch
niet.

niet vol/ hy heeft een gat: ten helpt al niet wat wy ghe-
uen: daer wort niet wtghericht/ &c.

¶ Schijnt wat te wesen/ dese braghe/ Maer voorwaer
die spreken veel die weynichste daer toe gheuen. Maer om
v te beantwoorden/ segt my: Hebt ghy den staet der Lan-
den ghesien? ofte opt bedacht wat die oorloghe wel kost
en behoeft/ teghens t' ghene dat daer daghelick wort ghe-
contribueert? compt en besiet hoe veele Landen en steden
te besetten zijn/ en wtter handt te onderhouden/ tot kosten
vanden generaelen ontfang/ daermen niet eenen stuuer af
is ghenietende: besiet den grooten last der schepen vā oor-
loghen/ betalinghen van ruyteren en knechten/ fortifica-
tien/ ammonitie van oorloghen en prouiande/ en meer an-
dere onkosten die ick niet alles hier kan noemē/ gaet maect
eens reeckeninghe/ ende besiet hoe ghy wt compt eer ghy
meer daer van spreekt.

¶ Voorwaer alle wie ghy zijt om te contrerolleuren/ ofte
die ghemeente opzoerich en onwillich te maken teghens
haere Ouerricheden/ oftmen v eens inde Kegeringe soude
stellen/ wat soudt ghy met uwe neus-wijsheyt en opzoer-
maken te weghe brengen/ dwelck den Lande ten goeden
mochte streckē? voorwaer niet anders dan den Athenien-
schen onderganck: Want bedenct dat/ indiē ghy dus ghe-
sint zijt/ een ander is anders ghesint. In somma/ so veel
menschen/ so veele sinnen: daeromme *Ne sutor ultra crepi-*
dam, Een peder in zijn beroep. Vertrouwt sulcx den ghe-
nen die by ghemeenne stemmen/ by v selfs/ ende wt uwen
steden ghecommitteert werden/ zijn sy ghierich/ baet-
soeckende/ ofte niet ghetrouw/ waeromme sendt ghy so-
danighe/ houdt die thups/ ende laet comen daer ghy niet
op te spreken en hebt/ ofte laet andere met vreden ende on-
ghecalomnieert/ ende en segt niet meer dan ghy weet en-
de wilt verantwoorden/ doch ter plaetsen daer het kan
brucht

vrucht doen / ende niet by den onberstandighen.

Willende hier mede allen verstandigē en cloeckhertigen Patrioten gebeden hebben om deses een eynde te maectē / den onberstandelē te onderrichten totte eendracht en stillicheyt / op dat onse ghemeene saeckedoor haer onberstant niet te gront en gae / te meer also onser gemeyner vpāt daer toe alle tijt arbeijt door opzuerige geesten / dat zy oock dit discours niet indē wint slaen / ofte verachtelijck en lesen / maer wel herknauwen / ende ter herten nemen / oock diet niet kunnen / voorlesen.

Het welcke alles doende / twifelt niet of wy sullen in cozter tijt spoozen / hoe veel die Almachtighe God / ons en onse regieringhe ten bestē sal laten ghedijen / ooc wat vruchten daer van sullen comen / wilt aenhoorē / dat alle onse nabuerighe Coninghē Potentaten en heeren / aenmerckēde onse volstandicheyt in tegenspoet / mitsgaders dat wy met sodanigen affectie / bestendicheyt / toeverlicht en goede ordre soecken en begeeren ons seluen tegens den wrede Spaengiaerden en haren aenhangheren te beschermen / oorsake sullen krijgen / nemen en hebben / omme ons te helpen / en by te staen met alle haer vermoghen / ende ter contrarien / tselue verachtende / in welcken een Calamiteyt / jammer / verdriet / elent / hongher / dorst / Tyrannie / ghewelt / schorsfiering van vrouwen en dochterē / plonderinge / rantsoenering / brant en moort / verbolch / druck en lyde / wy sullen gheraecken beneffens alle voorghestelde periculen / dwelc daer na wel beclaecht sal werden / maer te laete.

Het sullen entlick / die ghespaignolizeerde / omme dē eeboudigen herten een afkeer te maectē / niet swijgen / maer den seluen eerst die groote gramschap des Coninc van Spaingien en zijne groote macht / daer naer zijne claerblincke en veerschijnende goedertierenheyt door ooghen stellen en schilderen / ende dat het beter soude wesen / men

D

met

met hem versoende ende paps maecte/dan langher te re-
belleeren/etc.

Maer wacht v alle ghy goethertighe/ *Inimico reconciliato ne dederis fidem*, ghelooft den versoenden vanden niet.
Quia latet anguis in herba, ghy soudt een slanghe op voeden.
Parturiunt Montes. Eyscht wat ghy begheert / tsal anders wesen.
Nascetur ridiculus Mus, Al warent gulden berghen/ dat hy v looft/dat sal hy vast houden.

Doorwaer o Vaderlant wy moeten Godt Almachrich bidden om eenen goeden vastē Godsaligen vrede/die welke tot vrijheyt onser conscientien en der Tyrannie wtroeding/ mochte ghedijen/ maer hoort/legghen wel eenighe Spaense paps-wēschers/wat schaet het dat mē eens hoort sprecken/die conditien moghen soo wesen/men kanse of aennemen ofte laten/jae men sal v blanckē senden met des Coninck hant en zeghel bevestiget/schrijft daerinne sodanighe conditien als ghy wilt/die Coninck salt al ratificerē/hoe begeert ghy schoonder presentatie/delicates smoutpeeren/soeter spaenser vijghen/ ende meerder barmherticheyde.

Esoude al wel lucken/ick saghe het hijlick ghemaect/maer dit erch loos Reputgen de vos / coemt hier met zijn Latijn/ick sorghe waer het arm beestgen int Spaingien/d'Inquisitie soude hem als een ketter branden/ het roept ouerluyt/ick en comer niet/ *Quia me Vestigia terrent*/om dat hy juyt wat looser was dan dander Buffels/Ezels/Mulden/Cappoenen/Ossen en Schapē/die den cranckē leeuw gingen besoecken/en haer voetstappen hy wel na thol sacht gaene/maer gheen wtcomende/vreelde vant gene datter ghelchiet was.

Dit heb ick hier in gheboecht / om dat wy niet minder loos behooren te wesen/dan desen vos/en alle saecken wel ouerdencken / bysonder des Pardoens van Nimmeghen
hier

hier bozen ten deele verhaelt / daer nae die Vreedehande-
linghe van Breda/ Pacificatie van Gendt/teewich Edict
met Don-Jan d'Austrice ghemaect/waer ghy moet beloe-
uen te willen/sullen/en moeten onderhouden die heylighe
Roomsche Catholicke kercke/daer beneffens die behoor-
like ghehoorzamenheyt des Coninc in Hispanien/bedenct
wat daer onder schijnt/ Item daer na die behendighe en
trouweloose Vreedehandel tot Ceulen/ hoe vast en besten-
dich dat sulcx al ghedaen is tot des landts welvaert? be-
wijst leyder die daet/te meer/ dat die Coninc int minste
deel niet wil toe laten/die Religie en vryheyt der conscien-
tien/mach bliicken aent ghene die van Brugge en Gent-
sche verraders nu laest int werck ghestelt hadden.

Dunct v dan o Vaderlant/dat het v gheraden dient int
minste deel/met sodanighen Tyran en moorder/met soda-
nighe trouweloose/eer-vergetende en Vaderlantsche ver-
raders van payse te handelen/ laet ons gheen oorzaecke
wesen/dat wy met so veel Milioen Milioenen menschen/
niet onder tjock en slavernije en vallen/maer ons thonen
dat wy herten/handen/voeten/ooghen/oozen/herffenen/
en verstant hebben/en oock goets ghenoech tot behoude-
nisse onser vryheyt/ende wilt deselue/die v int perticulier
van payse spreucken/niet beter achten en houden/ dan die
van Brugghe ende eenighe van Gendt.

Wy en behoozen niet te treden inden wercken des Hee-
ren/ende zijnen toelatinge/noch hem oock geen mate stel-
len van paps ofte oorloge/als ons te passe coet ofte beliest/
want het al in zijne handen staet/maer wy moetent al ons
selfs wijten/en dat ons Godt wil en sal straffen/om onser
sonden/daer van wy noch niet ophouden/sulcx dat het te
duchten is/dat God zijn gramtschap so haest niet van ons
nemen sal wat ons daer teghens te doen staet: wort dage-
licx ghenoech in Godes woort vermaent/gheleert en ghe-

D i j. roepen/

roepen/ dwelck doende en nabolghende/sullen wel haect
in gheruster vrede/paple/ende eenicheyt gheraecten.

Dit hebb' ick u ver E. vvel vvillen presenteren, ter gedachte-
nisse ende Hooch-loflijcker memorien, onses so vvijtberoemde
Gedions, vviens vermaninghen en Wtersten vville u ver E. ge-
noechsaem mede bekend zijn, u ver E. al ist met gheen Cicero-
niaensche vvelsprekētheyt noch Erasмияensche diepsinnicheyt
verciert, my ten besten af te nemē, en door het venster mijn hert
ende ghemoet oordeelen, als bereyt vvesende om mijn Vader-
lant, onder u ver E. ghebieden, totten laetsten droppeel bloets,
te helpen beschermen, de vvillen u ver E. hier door verseeckert
vvesen.

Edele, Erentfeste, Hoochgeleerde, Wijse Voorsichtighe seer discrete
mijnen ghebiedende Heeren, ick sal Godt bidden u ver E. te vvillen
sparen in alijt vreedtsamighe vveldaerts Regering. Begonnen binnen
Campen ende tot Delft voleyndet, desen x. Augusti 1584, nouo stilo,

Van uwer Ee.

**Die alijt blijft, dat hy gheweest is een onderdanich Dienaer
I K.**

Den Autheur tot het Boecxken.

Oorlof nemende ghy boecxken, bidt en begeert
Aen allen lesers, segghende, laet my onghelameers,
Want d' Autheur my vut vveldaerts affectie
Heeft ghemaect ende vutgheschiet, onder die protectie,
Vanden Heeren Regierders deser Landen,
Behaghet v niet, neemt pen en papier in handen,
Schrijft en vermaent (als hy) vvat goets betuyghende
Maer ghedenct, men vut een bloem tfenijn en tsoet is sayghende.

Arrata.

Daer staet beerseken/leest vvensterken fol. a ij. alleen/leest allen fol. a iij. quade/leest
goede fortificatie fol. B iij.

